



Komunikadu Imprensa
23 Novembru 2022
Parlamentu Nasionál

**JSMP husu ba Instituisaun Estadu sira atu Ezekuta Orsamentu 2023 ho
Responsabilidade no Transparánsia**

Parlamentu Nasionál (PN), Kinta-feira 17 Novembru 2022, liuhusi reuniuan plenária, aprova ona iha espesialidade no iha finál globál Proposta Lei Nú.46/V(5ª) kona-ba Orsamentu Jerál Estadu (OJE) ba tinan 2023 ho votu afavór 42, kontra 21 no abstain 2. Montante totál OJE 2023 ne'ebé PN aprova hamutuk billiaun US\$3.155.715.306. Husi totál orsamentu ne'e inklui mós ho orsamentu husi fundu impréstimu ho montante milliaun US\$200,000.000.

Orsamentu Estadu iha tinan 2023 sei foka ba iha área estratéjia 16 hodi bele kontribui ba rezultadu nasional 28 liuhusi prosesu monitorizasaun no avaliasaun ba setór administrasaun públiku ne'ebé mak regula iha Artigu 3 Nú. 1 no 2 Lei Nú.8/2022 Lei **“Grandes Opções do Plano para 2023”**, ne'ebé mak sei finansia programa sira husi Instituisaun Estadu hamutuk 109 ne'ebé mak hola parte iha perímetru orsamentál tinan 2023.

“JSMP apresia ho esforsu no serbisu Parlamentu Nasionál no Governu durante diskusaun no votasaun hodi aprova ona OJE 2023. Diskusaun orsamentu ne'e kle'an tebes hodi tau importánsia ba setór produtivu no rekursu umanu nu'udar área prinsipál atu bele hadi'a moris povu no nasaun nian. Nune'e, JSMP husu atu Governu no Instituisaun Estadu sira atu ezekuta orsamentu Estadu 2023 ho responsabilidade no transparánsia tuir planu no programa ne'ebé OJE ne'e aloka ba, hodi bele atinje meta sira ne'ebé Governu trasa no hatan ba nesesidade sira povu nian”, dehan Diretora Ezekutiva JSMP, Sra. Ana Paula Marçal.

JSMP mós husu Parlamentu Nasionál atu kontinua ativu iha hala'o nia knaar fiskalizasaun ba ezekusaun OJE 2023 nian ne'e no Komisaun Anti Korrupsaun (KAK), sociedade sivíl no entidade hotu inklui comunidade no ajénsia internasionál sira hotu ne'ebé iha nia representante iha Timor-Leste atu hola papél iha serbisu auditoria sosiál hodi asegura transparánsia no akontabilidade, liuliu ba programa prioridade hirak ne'ebé mensiona.

Entretantu ámbitu OJE 2023 iha previzaun ba órgaun serbisu iha subsetór públiku administrativu sira ne'ebé kompostu husi Administrasaun Sentrá biliaun \$2,800.000.000.00, Orsamentu Seguransa Sosiál miliaun \$235.715.306.00 no Rejiaun Administrativu Espesiál Oekusi-Ambeno miliaun \$120.000.000.

OJE 2023 mós introdús medida foun sira kona-ba hasae impostu no taxa kontribuisaun ba bebida ka buat hemu sira ne'ebé alkóoliku no bebida sira ne'ebé midar, tabaku, automóvel, sasan importasaun bazíka sira no selu-seluktan ne'ebé regula iha Artigu 3 Lei OJE 2023.

Entretantu medida sira seluk mak kona-ba polítika dívida públiku prevee iha Artigu 5 ne'ebé durante ne'e foka de'it ba iha área infrestrutura estratéjika, maibé iha OJE tinan 2023 osan impréstimu sei kobre mós iha área edukasaun, formasaun, transporte, turismu, agrikultura no enérjia renovável. Alende ne'e, alterasaun ba órganika Governu iha Artigu 8 sei fó biban ba Governu liuhusi Ministériu Finansa hodi halo alterasaun ba orsamentu ho respeito ba valór OJE.

Durante diskusaun no votasaun ba OJE 2023, deputadu sira konsege apresenta proposta adisionál hamutuk 71. Husi proposta sira ne'e, proposta 10 mak pasa, proposta 15 la pasa, proposta 34 retirada, proposta 5 prejudikadu no proposta 7 substituidu. Entretantu proposta ne'ebé la pasa barak-liu husi bankada opozisaun CNRT ho PD, inklui retira. Enkuantu proposta ne'ebé liu barak-liu mai husi bankada Governu nian inklui mós proposta retirada.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>